

Mengasihi Sesama Islam

Daripada Anas bin Malik RA, Rasulullah SAW bersabda:

لَا يُؤْمِنُ أَحَدُكُمْ حَتَّى يُحِبَّ لِأَخِيهِ مَا يُحِبُّ لِنَفْسِهِ

Maksudnya: “Tidak beriman seseorang kamu sehingga dia mengasihi saudaranya seperti dia mengasihi dirinya sendiri.”

Hadis *muttafaq alaih* ini diriwayatkan oleh al-Bukhari (1/73) dan Muslim (1/67)

Pedoman dan Iktibar Hadis

Antaranya:

1. Kasih sayang sesama Islam adalah suatu kemestian. Inilah yang diasaskan oleh Baginda SAW. Kehidupan begini berpunca daripada kemesraan berkomunikasi, kemesraan kecintaan dan kasih sayang serta saling bersimpati. Kejayaan Rasulullah SAW melahirkan masyarakat harmoni dan simpati dapat dijadikan contoh yang paling baik bagi mewujudkan suasana kerjasama dalam masyarakat kini.
2. Antara sifat orang yang beriman ialah saling bantu-membantu seperti yang diasaskan oleh Rasulullah SAW antaranya ialah wujudnya keadaan bersimpati antara anggota masyarakat, bak kata pepatah: “Cubit peha kiri, peha kanan terasa sakit.”
3. Hubungan erat dan kerjasama menjadi amat penting khususnya dalam menjayakan satu-satu misi sama ada kenegaraan atau kemasyarakatan. Dengan kerjasama, sebarang perkara yang sukar dan susah bahkan dianggap hampir mustahil menjadi amat mudah, senang dan pantas diselesaikannya.

4. Perhatikan peperangan Khandak atau Ahzab yang berlaku pada tahun 5 Hijrah. Antara tentera musyrikin Mekah bergabung dengan qabilah Arab, jumlah kekuatannya hampir 10 000 orang cuba menyerang Madinah yang jumlah tentera Islam hanya 3000 orang sahaja. Tetapi dengan strategi yang diinovasikan oleh Salman al-Farisi dengan cara menggali parit, Rasulullah SAW telah membahagikan jarak galian untuk beberapa orang secara kerjasama. Ianya dapat disiapkan dalam masa beberapa hari sahaja.
5. Akhirnya umat Islam dapat menjadikan parit tersebut sebagai benteng daripada kemaraan musuh sehingga datangnya pertolongan Allah apabila diterbangkan segala khemah dan pulanglah kaum musyrikin dalam keadaan hina dan patah semangat. Inilah berkat kerjasama.
6. Justeru, marilah sama-sama kita pameran kasih sayang sesama kita sehingga mendapat keredaan Allah yang akhirnya melahirkan masyarakat dan negara yang disebut *baladun tayyibatun wa rabbun ghafur*.

Mutiara Hikmah

- ❖ **Pujangga berkata:** Sesiapa punya seribu kawan, dia tidak punya kawan hendak bergembira, dan sesiapa mempunyai musuh, dia menjumpainya di mana-mana.
- ❖ **Pujangga berkata:** Jangan menganggap semua kritikan yang diarahkan kepada anda sebagai satu permusuhan. Tetapi ambillah faedah yang ada di dalamnya tanpa perlu melihat maksud orang yang mengkritik itu. Kerana ketika itu anda lebih memerlukan perbaikan daripada pujian.

Kisah Teladan

Syeikh Muhammad Said Ramadhan al-Buti menyebut kisah bidalan orang Arab. Di sebuah taman terdapat banyaknya pohon kayu, ada yang besar dan ada yang kecil. Mereka bersuka ria. Tiba-tiba satu hari jatuh sebilah mata kapak menyebabkan semua pohon kayu menangis dan takut. Ini kerana sudah pasti mereka semua akan ditebang.

Akhirnya mereka bertemu dengan pohon yang paling tua dan mengadu hal tersebut. Lantas jawab pohon yang tua dan mempunyai banyak pengalaman hidup seraya berkata: Jangan takut dan jangan menangis. Sesungguhnya mata kapak tersebut tidak boleh menebang kamu selama mana kamu tidak memberi kepadanya dahan-dahan kamu untuk dijadikan hulu kapak.

Iktibar dari kisah ini menunjukkan bahawa kerjasama ke arah kebaikan dan jangan sesekali khianat dengan membantu musuh untuk mengalahkan kawan dan rakannya.

Lihatlah susunan makhluk bagaimana konsep kerjasama secara fitrah yang Allah tabiatkan mereka sehingga memungkinkan mereka untuk meneruskan kehidupan yang penuh mencabar. Semut dengan kumpulannya boleh mengangkat makanan yang jauh lebih berat dari tubuhnya hasil kerjasama, lebah boleh memungut madu-madu bunga dari pelusuk taman dan pohon kayu akhirnya menjadi madu yang lazat diminum sebagai penyembuh dan penawar untuk manusia.

